

Date – 24/03/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Vawiin khan Minister te hna chanpual siksawi a ni a, thlathar April ni 1 atanga hman tan tur a ni.
2. Mizoram Police chuan tunhnai khan Heroin Kg 4 chuang, tualchhung rate-a cheng vbc 1, nuai 41, sing 6, 6,000 hu an man.
3. President Droupadi Murmu-i chuan Chhattisgarh-a helten an chenchilh thin mipuite ralmuanna tur chu a hnai tawh tih a sawi.
4. US-in boruak atanga Yemen khawpui Sana’a a beihnaah mi pakhat a thi a, 10 chuang an hliam.

<><><>

PORTFOLIOS RESHUFFLE

Vawiin khan Minister te hna chanpual siksawi a ni a, thlathar April ni 1 atanga hman tan tur a ni.

Sorkar hriattirnaa tarlan danin, Home Minister Pu K. Sapdanga department chan pakhat Disaster Management & Rehabilitation Department chu Minister of State Prof. Lalnilawma hnenah pek a ni a, Pu K. Sapdanga hian Home Deptt., Urban Development & Poverty Alleviation Deptt. leh Department of Personnel & Administrative Reforms te a la enkawl chhunzawm dawn a, Prof. Lalnilawma chuan a department enkawl sa pahnih, Rural Development and Administration Deptt. leh Public Health Engineering Dept bakah Disaster Management & Rehabilitation Dept te a enkawl tawh dawn a ni.

Prof. Lalnilawma department chan pakhat, Horticulture Deptt chu Minister Pu C. Lalsawivunga hnenah pek a ni thung a, Pu C. Lalsawivunga hian a department enkawl sa dang pathum, District Council and Minority Affairs Deptt., Art & Culture Deptt. leh Animal Husbandry & Veterinary Deptt. te chu a la enkawl chhunzawm dawn a, hetihlai hian Local Administration Department erawh a enkawl tawh dawn lo a ni.

Minister Dr. Vanlalhlana chu a departmetnt enkawl sa 4-School Education Deptt., Higher & Technical Education Deptt., Information, Public Relations, leh Information & Communication Technology Deptt. te bakah Minister of State Pu F.Rodinglana department chan, Printing & Stationery Deptt pek belh a ni a, Minister of state Pu F. Rodinglana chuan Power & Electricity Deptt Commerce & Industries Dept te a la enkawl chhunzawm dawn a ni.

Minister Pi Lalrinpuui department chan pakhat, Tourism Department chu Minister of state Pu Lalnghinglova Hmar pek a ni a, Pi Lalrininpuui hian

Health and Family Welfare Dept leh Social Welfare, Women & Child Development Dept te a la enkawl chhunzawm dawn a, Minister of State Pu Lalnghinglova Hmar chuan a department chan sa, Labour, Employment, Skill Development & Entrepreneurship Deptt., Sports & Youth Services Deptt. leh Excise & Narcotics Deptt. bakah Tourism Deptt. te a enkawl tawh dawn thung a ni.

<><><>

HEALTH MINISTER

Health Minister Pi Lalrinpuiin Mizoram Universal Health Care Scheme tha mi hmang tan turin sawrkar chuan a tih tur hmasa tiin sawrkar damdawiin zawng zawngte tihchangtlun hna buaipui mek a ti.

Vawiina Aizawla ZPM Party inkhawmah thusawiin Health Minister chuan, Health Care Scheme hluiah chuan BPL Golden Card hmang thinte leh sawrkar hnathawkte a hrangin an awm a, he scheme thar hnuaiah hi chuan tlema khawsak harsa deuh ABPMJAY huanga awm leh sawrkar hnathawkte huang khatah a awm vek tawh dawn a ti a, an tihhmaih palh CSS hnathawkte pawh an telh dawn a, an tel theihna tur category siam a ni ang, a ti.

Mizoram Universal Health Care Scheme-ah hian damloten damdawiin an luh leh chhuah inkara an senso zawng zawngte an pek ngai lovin sawrkarin a lo buaipui fel vek dawn tih sawiin Health Care Scheme-a inziahlulh man hi thenkhatin a sang ti mahse hun hmasa nen khaikhin chuan a sang lo a ti a, Sawrkar damdawiin ni lo private damdawiinte pawh MUHCS hnuaiah hian tel turin a sawm tih a sawi a ni. Kan corr report I lo ngaithla ang.

VC- Health care scheme thar – Mipui Health Care hman tawh tur kaihhnawiha Sawrkar lam inbuatsaihna hrang hrangte enin Health Minister Pi Lalrinpuii chuan Zoram Medical College & Hospital, Falkawn a tlawh a. ZMC&H ah hian General ward, ICU, NICU, PICU leh Cabin te nen a. vaiin khum 420 an nei mek a, Health Care Scheme thar hman turah hian sawrkar in thawktu tam tak pek belh tumin recruitment process a. kalpui mek ni a sawi a ni a, hemi avanga General Bed thar hlak 52 leh Cabin thar. dang – 30 bakah, ICU khum 13 leh Cardiology khum – 6, NICU khum – 4 thar, Dialysis khawl – 10 hmanga hospital tih changtlun mek a ni.

Health Minister hian vawiin vek khan Aizawl Civil Hospital a tlawh a, Cardiology Unit tihchangtlunna atana hmalakna leh Cardiology ward-a Khum 11 awm mek, khum 11 thar dang dah belh a, khum 22 awm thei tura buaipui mekte chu a hmunah a enpui a, Cardiology CICU thar - khum 8 awmna tur, PICU – khum 4 leh Pediatric HDU khum – 8 te bakah Cath lab table 2 leh Recovery unit – khum 4 awmna siam thar tura ruahmanna leh hmalakna hrang hrangte chu a hmunah a enpui bawh a. Minister ho hian Health Department hotute chuan Department inbuatsaih na hrang hrangte an thlir ho leh nghal bawh a ni.

Hetihlai hian, Mizoram Pradesh Congress Committee Vice President Pu Lalnunmawia Chuaungo chuan sawrkarin Universal Health Care a duahchhuah private Hospital ten an zawm duh rih lo chu an ngaih a tha chiah lo tih sawiin, an party chuan sawrkarin Health Care thar a kalpui dan te an lo zir zel anga, health care tha zawk mipui hnenah chhawpchhuah an tum tih vawiina an party Political Session ah a sawi a ni.

<><><>

POLICE PR

Mizoram Police chuan tunhnai khan Heroin Kg 4.722 a rit, tualchhung rate-a cheng vbc 1, nuai 41, sing 6, 6,000 hu an man a.

Mizoram Police Press Release-in a tarlan danin, tun thla March ni 13 zan khan Zokhawthar PS team New Hruaikawn Road-a mobile patrolling te chuan Bike pathum leh Champhai Taxi pakhat, New Hruaikawn atanga Champhai pan mek te chu tidingin thu an zawt a. Hetia thil an zawh lai hian Taxi leh Bike pathum te hi thawklehkhatah chak takin Champhai lam panin an tlanchhia a, Police te chuan um nghalin, Chhuansawmlala kum 18, Khuangphah Taxi khalh leh a mi phurh Vanlalhriata, kum 21, Zokhawthar te chu nangchingin man nghal an ni a. Bike pathuma chuang, puitling pali leh kum tling lo pakhat te pawh a hnuah man an ni bawk. Thu zawhfiahna atangin heng mite hian inthurualin a huhovin dan kalhin ruihhlo an tawlh ngei tih an inpuang a. Satha ip hring leh thawmhnaw ip dum chhungah heng ruihhlo hi dahin Taxi-ah an hlang ngei a, Police duty an hmuh hnuah kawng thlangah an thehthlak thu an sawi a ni.

An inpuanna bawhzui hian a tuk March ni 14, zing dar 6 leh a chanve khan Police te chuan anmahni hruiin an ruihhlo paih thlak hi an zawng a, Police duty-na hmun atanga Kilometre 1 leh a chanve velah ruihhlo heroin hi an hmu ta a ni.

He thila inhnamhnawih mi paruk – Chhuansawmlala, kum 18, Khuangphah, Champhai Dist, Vanlalhriata, kum 21, Zokhawthar, Zothansanga , kum 20, Zokhawthar, Lallianmawia , kum 19, Zokhawthar, Lalmalsawma, kum 21, Zokhawthar, leh Zomuansanga , kum 18, Bethel Veng, Champhai te chu dan angin man nghal an ni a, kum tling lo pakhat erawh JJB Champhai hnena hlan turin hrenchhunzawm a ni. He thil hi uluk taka chhui chhunzawm niin he ruihhlo tawlhruka inhnamhnawih mi pahnih :- Henry Lalbiakzinga , kum 34, Dintar, Aizawl leh Laltluangzela, kum 28, Zokhawthar te pawh March ni 15 khan Aizawlah man an ni a. He case hi uluk taka la chhui chhunzawm zel a ni.

<><><>

NGOCC

NGO Co-Ordination Committee, (NGO CC)-in Assam Rifles ten an chhuahsan ramte chu Mimal, Political Party, Kohhran leh Pawl hrang hrang te chu mahni hmun hma atana hma la lo turin a ngen.

Mizorama tlawmngai pawl hrang hrang- Central YMA, MUP, MHIP, MZP, MSU intelkhawm, NGO CC vawiina Aizawla thukhawm chuan Aizawl khawpui laili a Assam Rifles te chhuahsan hmun ruak chu venhim a, humhalh vat a tul a ni an ti a, Mizoram sorkar chu a venghimtu tur, security ruahman vat turin leh mipuite tana a tangkai thei ang bera hman a nih theih nana theihtawp chhuah a hma la turin an ngen.

NGO CC thuchhuah chuan Mimal, Political Party, Kohhran leh Pawl hrang hrang te chu mahni hmun hma atana hma la lo turin a ngen a. NGOCC chuan Assam Rifles ram luah chhunga mimal LSC nei engemawzatin, mipui hmakhua ngaia an LSC an hlan let chu ropui an tih thu sawiin, ram leh hnam tana an inpekna an ngaihlu tak zet a, hetihrial hian LSC nei dangte pawh ram leh hnam tana hlan ve turin an ngen nghal tih an sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PRESIDENT MURMU SAYS TASK OF BRINGING LEFT-WING EXTREMISM-AFFECTED PEOPLE TO MAINSTREAM IN FINAL STAGE

President Droupadi Murmu-i chuan vawiin khan Chhattisgarh Legislative Assembly Silver Jubilee lawmna a hmanpui a. Chhattisgarh-a helten an chenchilh thin mipuite ralmuanna tur chu a hnai tak tak ta a ni a ti.

President chuan Chhattisgarh-a Naxal hel awm thinna mipuite chuan hmasawna kawng zawh an duh takzet tawh a ni a ti a. State mipuite chu hel chianbuai lohva an awmna turin theihtawp chhuah a ni a, chu hun chu a hnai tawh a, hun rangkachak a rawn inherchhuak dawn a ni a ti.

He hunah hian President chuan chhehvel thilte vawn him (environmental protection) pawimawhna uar takin a sawi bawk.

<><><>

U.S. AIRSTRIKES IN YEMEN KILL ONE, WOUND DOZENS AS CAMPAIGN INTENSIFIES

US-in boruak atanga Yemen khawpui Sana’a a beihnaah mi pakhat a thi a, midang 10 chuang an hliam.

Yemen-a Houthi helte sawi danin tukin zing khan US chuan Yemen ram chung hmun hrang hrang tinzawnin an bei a ni. Heti hian US chuan ni 10 chung chawl lovin Yemen hi a bei ta a ni.

US President Donald Trump-a kaihhruai beihpui thlak hian tuipuia bungraw phura sumdawnna leh Israel ralmuan lohna thlentu helpawlte chetna tukdawl chu a tum a ni a, Iran nawr tawmna hmanrua a ni tel bawk a ni.

Israel-in Gaza Strip-a tanpuina lut tur a dan hnu-a Houthis-ten Israel lawng an beih chhonzawm leh tak hnu, March ni 15 atanga US airstrike kalpuiah hian mi 53 an thi tawh a ni.

<><><>